

莊

簡

集

壯

簡

集

四庫全書珍本初集

別集

集

類部

商務印書館受教育
部中央圖書館籌備
處委託景印故宮博
物院所藏文淵閣本

欽定四庫全書

集部四

提要

莊簡集十八卷

別集類三 宋

臣等謹案莊簡集十八卷宋李光撰光有周

易詳說已著錄其集目載於紹興正論者四

十卷載於宋史藝文志者前後集三十卷載

於焦竑國史經籍志二十六卷錯互不合錢

溥秘閣書目葉盛菴竹堂書目俱載有莊簡

集八冊是明初尚存其後散佚原目多寡遂無可考證今從永樂大典中掇採編次共得詩四百二十五首詞十三首雜文二百六十五首釐為十八卷考王明清揮麈餘話稱蔡京既敗攻擊者不遺餘力光獨無劾章坐貶謝表云當垂涕止彎弓之射人以為狂然臨危多下石之人臣則不敢而集中無此一篇又趙牲之遺史載光在儋耳嘗賦東坡六無

詩今止有食無肉居無屋二詩餘四題亦尋
檢不獲是佳篇之遺落者已多然即就其現
存者觀之波瀾意度亦約畧可覩考光本傳
光值國步沾危之時忠憤激發所措置悉有
成緒又以爭論和議為權相所排垂老投荒
其節概凜然宜不可犯而其詩乃志諧音雅
婉麗多姿大抵多托興深長不獨張溟雲谷
雜記所舉雙鴈一詩道中贈樞密使臣一詩

為清絕可愛至所上奏議如論守禦大計勸
車駕親征戒約煩苛裁減營繕諸劄子尤剴
切指陳有裨國是論梁師成燕瑛等疏疾惡
如風俱可想見其丰采迨過嶺以後與胡銓
往還簡札甚夥乃皆醇實和平絕無幽憂牢
落之意其所養抑又可知矣名臣著述幸而
獲存雖殘章賸句固當以鴻寶視之也乾隆

四十六年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

莊簡集卷一

五言古詩

讀書

低頭對千載把卷竟長日興亡見俯仰忠佞更得失意
合心自知感慨屢沾臆朱黃紛几硯緗素互編帙比隣
亦好事挾策到蓬蓽縱談及羲皇坐待寒月出

贈李願老

宋 李光 撰

弘毅年少時學易一念酷研精覃思苦見理不見欲一
朝感蒼蒼床下產神竹弘毅益自信夜寐目不屬族長
閔其勞令人付斤劇惜哉凌雲姿一斷不復續弘毅少
安枕旦氣幾為梏時匠司剪伐壽命旋見感神明信可
畏感應亦何速至今旁舍笋不生弘毅屋康成書帶草
千載登史錄吾書此段竒後學宜三復弘毅勉歲寒任
道照猗綠

夜起對月

西風掃浮雲素月清夜滿幽人愁不寐一夕幾輾轉天
河見澄霽江流俯清淺身隨栖鳥息興與孤雲遠叩門
復何人隔竹空吠犬竟須掩闕眠爐薰裊香篆

縣齋清坐有懷

門外無俗軌相對惟獨鶴短翮雖未全志已翔寥廓軒
然避雞羣不受鷹隼搏持以比佳士潔白誠相若筆端
生雲烟胸中貯丘壑憐君青雲姿胡為滯蓮幕英豪出
草萊闔茸履臺閣新詩時有寄妙語洗煩灼種學求根

源意匠無斧鑿自慙非清流訟牒困酬酢好古雖膽大
去惡愧力弱君來破吾顏商榷盡流畧高軒掛琴劍景
物如宿約遙山倚青冥遠水帶城郭圓荷已浮花晚筍
亦脫籜涓涓風露清湛湛河漢落濁醪有妙理與子隨
意酌萬事付儻來何必問日脚

學道未忘名欲跨揚州鶴淵明賦歸來頗恨未恢廓平
生剛褊性敢避窮獸搏君詩如清琴平淡猶賀若岑然山
水音妙響振林壑寧為太史走豈事桓温幕樂哉吳望

游微涼生殿閣况茲積雨後枕簟謝焚灼未能去三彭
便可休六鑿跌宕文字間詩酒自相酢氣凌李杜豪力
振曹劉弱偏師攻長城稍稍出方畧山川助離騷景象
如宿約陰風起虛籟暮靄昏城郭萋萋泛金塘篴管墮
銀籀卧看曉參橫坐待殘月落不愁衣典盡尊空莫起
酌明朝醉復醒生憂押垂脚

雪中過盤石山寄劉季山

離家六十日晴嵐逐征鞍已嫌狐裘重漸喜絺縠單竭

來古清湘狂風捲濤瀾小市人寂寂夜深雪漫漫誰知
桂嶺北風雪如長安明朝過盤石仰見蒼蒼山上有千
尺松下有百丈灘劉子方避謗結茆寓其間却掃謝友
朋兒女俱團團南行敢躊躇履險如驚湍我心本無慮
莫作拘囚者肯學老鍾儀楚奏聲嘶酸

伊洛節上人寓浯溪中宮寺作溪月亭諸人咸

賦詩輒留鄙句

結亭臨大江浯溪出其側道人傍溪月月照溪逾碧當

知月在天分身千百億此月有虧盈我心本澄寂合眼
聽溪聲開眼見溪色聲色兩不留我心何處覓夢覺月
在窻還如舊知識

次韻子忱游東山古風

休沐不暇懶趁此郊原晴駕言出東門蹠躩馬在垌江
山恣游眺頗愜幽人情同行有勝侶豪氣如陳登妙語
傾錦囊璀璨珠璣盈暫釋簿領勞頓覺心迹清人生一
世中轉徙如郵亭愛君絕塵姿坦坦心地平當年功名

念晚節師淵明出處豈有心敢論虧與成吾衰百念冷
端如在家僧東山本非山名字空崢嶸不見古松色詎
聞山鳥聲演師獨面壁燕坐朝黃庭骨冷喚不回蚌珠
祕龕燈

次韻元裕同游東山佳什東坡所謂愛此小天
竺即其地也

東坡謫蠻荒夢想兩天竺哦詩寄東山妙響振林麓
作祠衛公旁一杯奠椒漿相望柳柳州追配韓潮陽

懷人空隕涕亭榭今荒墟溪山不改色松聲契真如嗟
余麋鹿姿慣逐漁樵伴平生鐵石腸那復置冰炭尋山
得佳侶聊遂幽人意登臨有遐矚俯仰觀此世君為丞
相孫仕作淵明清一枰可消憂五字堪析醒人生各有
役詩慕豈妨道閉戶朝黃庭習氣終一掃

杜子固參議累覓南憲詩勉成鄙句子固謂杜
氏古無二族祁公其近屬也

長懷杜陵老遐想靖節翁二子不並世千載餘清風君